

夢

宋

吳

自牧

著

梁

錄

中

進步書局校印

蘇子州

如夢

PDG

夢梁錄卷八

宋 錢塘吳自牧著

大內

大內正門曰麗正門有三。皆金釘朱戶。正畫棟雕甍。覆以銅瓦。鐫鏤龍鳳飛翔之狀。巍峩壯麗。光耀溢目。左右列閣。待百官侍班閣子。登聞鼓院。檢院相對。悉皆紅杈子。排列森然。門禁嚴甚。守把鈐束人無敢輒入。仰視至晡時。各門下春布幕護之。麗正門內正衙。即大慶殿。遇明堂大禮正朔大朝會。俱御之。如六參起居。百官聽麻。改殿牌為文德殿。聖節上壽。改名紫宸。進士唱名。易牌集英。明禋為明堂殿。次曰垂拱殿。常朝四參起居之地。內後門名和孝。在孝仁登平坊巷之中。亦列三門。金碧輝映。與麗正同。把守衛士嚴謹。如人出入。守闔人高唱頭帽號。門外列百僚待班閣子。左右排紅杈子。左設閤門。右立待漏院。客省四方館。入登平坊。沿內城有內門曰東華。守禁尤嚴。沿內城向南皆殿司。中軍將卒立寨衛護。名之中軍聖下寨。寨門外左右俱置護龍水池。沿寨向南有便門。謂之東便門。禁庭諸殿更有者十。曰延和。曰崇政。曰福寧。曰復古。曰緝熙。曰勤政。曰嘉明。曰財殿。曰選德。曰奉神御殿。名欽先孝思之殿。更

有天章諸閣。奉藝祖至理廟神御。御書圖製之籍寶瑞之閣。建于六部山後。供進御膳。即嘉明殿在勤政殿之前。勤政即木帷寢殿也。嘉明殿相對東廊門樓。乃殿中省。六尚局御廚祇應內侍人員俱集於此。殿上常列禁衛兩重。時刻提警出入。甚嚴。內皆近侍中貴。殿之廊廡皆知省御藥御帶門司內轄等官幕次。聽候宣喚。小園子快行親從。輦官黃院子內諸司司屬人員等上番者。俱聚于廊廡祇候服役。如宮禁買賣進貢。皆由此入。惟此處浩穰。每遇進膳。自殿中省對嘉明殿禁衛成列。約欄不許過往。省門上有一人呼唱。謂之撥食。次有紫衣裏捲脚幞頭者。謂之院子家。托一合用黃繡龍合衣籠罩。左手攜一條紅羅繡手巾。進入於此。樣約十餘合。繼後又托金瓜各十餘合。進入。若非時取喚。名曰汎索。皇太后殿名曰坤寧。皇后殿名曰和寧。兩殿各有大官及殿長內侍及黃院子幕士殿屬親從輦官等人祇候。諸宮妃嬪等位次。亦有內侍提舉。閣分官屬掌箋奏。院子小園子等人祇直和寧門外紅杈子。早市買賣。市井最盛。蓋禁中諸閣分等位宮娥。早晚令黃院子收買食品下飯于此。凡飲食珍味。時新下飯。奇細蔬菜。品件不缺。遇有宣喚收買。即時供進。如府宅貴家。欲會賓朋數十位。品件不下一二十件。隨索隨應。指揮辦集。片時俱備。不缺一味。夏初茹

發新出。每對可直十餘貫。諸閣分貴官爭進。增價酬之。不較其值。惟得享時新耳。

德壽宮

德壽宮在望仙橋東。元係秦太師賜第。于紹興三十二年六月戊辰。高廟倦勤。不治國事。別創宮庭御之。遂命工建宮殿。扁德壽為名。後生金芝于左棟。改殿扁曰康壽。其宮中有森然樓閣。扁曰聚遠。屏風大書蘇東坡詩。賴有高樓能聚遠。一時收拾付閒人之口。其宮籞四面遊翫庭館。皆有名扁。東有梅堂。扁曰香遠。栽菊間芙蓉。修竹處有櫺。扁曰梅坡。松荊三徑。醕醑亭。扁曰新妍。木香堂。扁曰清新。芙蓉岡南御宴大堂。扁曰載忻。荷花亭。扁曰香榭。聽臨賦。金林檎亭。扁曰燦錦。池上扁曰至樂。郁李花亭。扁曰半綻。紅木樨堂。扁曰清曠。金魚池。扁曰瀉碧。西有古梅。扁曰冷香。牡丹館。扁曰文杏。又名靜樂。海棠大樓子。扁曰浣溪。北有櫺木亭。扁曰絳葉。清香亭前栽春桃。扁曰倚翠。又有一亭。扁曰盤松。高廟雅愛湖山之勝。於宮中鑿一池。沼引水注入。疊石為山。以像飛來峰之景。有堂。扁曰冷泉。孝廟觀其景。曾賦長篇咏曰。山中秀色何佳哉。一峯獨立名飛來。參差麓儼如畫。石骨蒼潤神所開。忽聞彷彿來宮園。指顧已驚成列岫。規模絕似靈隱前。面勢恍疑天竺後。孰云人力非自然。千巖萬壑藏雲烟。上

有崢嶸倚空之翠壁。下有潺湲漱玉之飛泉。一堂虛敞。臨清沼。密蔭交加。森羽葆。山頭草木。四時春閱。盡歲寒人不老。聖心仁智。情幽閒。壺中天地。非人間。蓬萊方丈。渺空濶。豈若坐對三神山。日長雅趣。超塵俗。散步逍遙。快心目。山光水色。無盡時。長將挹向杯中綠。高廟覽之。欣然曰。老眼為之增明。後孝廟受禪。議德壽宮改扁曰重華。御之。次憲明太皇后欲御。又改為慈福宮。壽域皇太后亦改宮扁曰壽慈。御之。繼後宮室空閒。因而遂廢。咸淳年間。度廟臨政。以地一半營建道宮。扁曰宗陽。以祀感生帝。其時重建殿廡。雄麗聖真威嚴。宮園花木靡不榮茂。裝點景界。又一新耳目。一半改為民居園地。改路自清河坊一直築橋。號為宗陽宮橋。每遇孟享。車駕臨幸。行燒香典禮。橋之左右。設帥漕二司起居亭存焉。

太廟

太廟在瑞石山。紹興間。建正殿七楹。十三室。二車十駕。款謁禮。後又幸建康。改為聖祖殿。復奉神祖還杭。仍復奉安于此。禮部太常寺遵典行郊禋禮前一日。朝饗太廟。仍設七祀板位。于殿廡橫階之北。又設配饗文武功臣。自韓王趙普以下二十五位。于橫階之南。後部寺奏請增建廟室。後東西增六楹。通舊十三楹。為一室。東西二楹。

為夾室及增廊廡作西神門冊寶殿祭器庫屋建齋殿及致齋閣子四十有四楹咸淳添置一室奉理廟神主通為一十四室皆正中又築二成之臺為祠宮升下以奉神主出入之地四祖廟在諸室之西奉僖順翼宣四祖神主耳每遇三年以孟冬給饗即廟行禮次詣諸室恭行祀典

景靈宮

景靈宮在新莊橋投北坐西乃韓蘄王世忠元賜宅基其子獻于朝改為宮向中興初高廟鑾輿幸此四孟朝獻俱于禁中行禮紹興年間臣僚奏景靈宮以奉祖宗衣冠之所即漢享廟也今就便殿設位以饗未副廣孝之意遂詔臨安府同修內司相度以蘄王宅基修蓋宮廟殿門扁曰思成前為聖祖廟宣祖至徽宗殿居中東西廊俱圖配饗功臣像于壁元天聖后與昭憲太后而下諸后殿居于後朝家欲再廣殿廡劉氏餘地其子孫復獻遂增建前殿五楹中殿七楹後殿十七楹自是齋殿進膳更衣寢殿次第俱備焉咸淳年間再命帥臣重修各殿度廟親洒扁目自聖祖宣祖太祖至理廟十六殿曰天興天元宣武大定熙文美成治隆大明重光承元瑞慶皇德系隆美明垂光章熙之扁自元天聖后至楊太后十五殿曰保寧太始儷極煒德

衍慶繼仁徽音坤元柔儀順承繼德順嗣徽光順天體德之扁宮後有堂自東齋殿西循廡而右為大堂三臨池上左右為明樓旁有蟠桃亭堂南為西齋殿過郊裡恭謝設宴賜花于此西有流杯堂跨水堂梅亭北為四并堂又有橘井修竹四時花果亭宇不能備載宮南建崇禋館命道流以奉洒掃晨香夕燈之職仍設內侍官提舉宮事務及宮司皇城兵侍衛之按朝野雜記太廟以奉神主一歲五饗朔祭而月薦新其五饗命宗室諸王奉禮朔祭以太常卿行事景靈宮以奉湊像歲行四孟饗主上親祀之帝后大忌宰臣率文武官僚行香僧道作法事后妃六宮亦皆繼往天章閣奉繪像時節朔望帝后生忌日皆徧薦內臣行禮內庭欽先孝思殿亦奉神御主上每日炷香凡朔望帝后忌辰節序皆親行酌獻之禮太廟之祭以行俎豆禮景靈宮祭以奉牙盤禮天章閣欽先孝思殿以奉常饌行家人之禮

萬壽觀

萬壽觀在新莊橋西紹興間建殿觀宇以太霄殿奉昊天寶慶殿奉聖祖長生殿奉長生帝西則純福殿奉元命後殿十二楹為二十二室奉太祖以下會聖宮章武殿應天璇運皆湊像以存東都遺制前殿東有圓廟室扁曰延聖章惠后室扁曰廣惠

溫成后室扁曰寧華。四孟廟獻畢。上由御園詣本觀諸殿行燒香禮。景定改道院齋閣。以奉皇太后元命。觀東建神華館。命羽士焚修。

御前宮觀 東太乙宮

御前宮觀在杭城者六。湖邊者三。多是潛邸改建琳宮。以奉元命。或奉感生帝。屬內侍提舉宮事。設立官司守衛兵士。凡宮中事務。出納金穀。日膳。道眾修崇醮。凡有脩整宮宇。及朝家給賜銀帛。殿閣貼齋錢帛。並皆主計給散。羽士俱沾恩甚隆。外觀皆不及也。東太乙宮在新莊橋南。元東都祠五福太乙神也。駐蹕於此。以北隅擇地建宮。以奉禮寺討論。宜設位像。按十神者。曰五福。君基。大游。小游。天一。地一。四神。臣。基。民。基。直符。凡行五宮。四十五年一移。所臨之地。歲稔無兵疫。紹興間。命浙漕度地建宮。凡一百七十四區。殿門扁曰崇真。大殿扁曰雲休。挾殿扁曰瓊章寶室。元命殿扁曰介福。三清殿扁曰金闕寥陽。齋殿扁曰齋明。火德殿扁曰明離。兩廡俱繪三皇五帝。日月星宿。嶽瀆九宮貴神等。與從祀一百九十有五。遵太平興國舊制。每祀用四立日。設籩豆簠簋尊壘。如上帝禮。兩廡以次降殺。車駕遇四孟朝饗。嘗親詣焉。孝廟又建元命殿。扁曰崇禧。淳熙建藏殿。扁曰瓊章寶藏。鐘樓扁曰瓊音之樓。理廟建

建長生殿奉南極度宗建通真殿以奉佑聖中祐殿奉元命順福殿奉太皇元命蓋易長生名改為延壽俱宸翰也又北宸殿奉北斗崇真館在宮南有齋八曰觀妙潛心泰定集虛頤真集真洞微虛白館有小圃亭扁武陵山在宮後小坡山乃杭之主山也

西太乙宮

西太乙宮在西湖孤山淳祐間太史奏太乙臨梁益分請用天聖故事於國城西南別建新宮以順方向于是擇八角鎮地建宮奉安遂析延祥觀地為宮以涼堂建正殿扁曰黃庭之殿殿門扁曰景福之門安奉太乙十神帝像東有延祥殿以備臨幸其外扁曰福祥之門凡宮之事儀四立祀典皆如東太乙例遵行咸淳間以德輝堂為元命殿明應堂為太皇元命殿迎真殿在宮之右有齋者二曰通真養素宮中舊有陳朝檜至今七百五十餘年矣蘇東坡嘗為僧志詮作詩以記側有小亭孝廟宸翰其詩石刻于亭下曰道人手種幾生前鶴骨龍姿尚宛然雙幹一先神物化九朝三見太平年忽驚華表依巖出乞與佳名到處傳此柏未枯君記取灰心聊伴小乘禪

佑聖觀

佑聖觀在端禮坊西。元孝廟舊邸。紹興間。以普安外第設立光廟。乾道年間。又開甲觀之祥。淳熙歲。詔改為道宮。以奉真武。紹定重建觀門。曰佑聖之觀。殿曰佑聖之殿。藏殿扁曰瓊章寶藏。御製真武贊及宸翰黃廷經皆刻之石。以賜。後殿奉元命。西奉孝廟神御。即明遠樓舊址也。孝廟少年時。題杜甫詩曰。富貴必從勤苦得。男兒須讀五車書。理廟又書全篇。餞于東宮。廳屏風上曰。碧山學士焚銀魚。白馬却走深巖居。古人已用三冬足。年少今開萬卷餘。晴雲滿戶團傾蓋。秋水浮堦溜決渠。富貴必從勤苦得。男兒須讀五車書。延真館在觀之右。命道流修晨香夕炬之供。館有道紀堂。虛白齋。

顯應觀

顯應觀在豐城門外。聚景園之北。處湖之東。水四面遶觀。觀額宣和所賜。靖康年間。高廟為康邸。出使至磁州。神馬引而南。建炎初。秀邸妻夢神指一羊。謂曰。以此為識。遂誕毓孝廟。由是累朝祠祀彌謹。殿中為顯應之殿。其神位曰。護國顯應興聖普佑真君。高廟為書殿扁。且揭以御名。昭其敬也。孝廟宸書瓊章寶藏之扁。理廟書洞古經。以賜。刻石。寧廟御題觀碑。其額以表功忠。觀之東有崇佑館。

四聖延祥觀

四聖延祥觀在孤山。舊名四聖堂。道經云四聖者紫微北極大帝之四將。號曰天蓬天猷翊聖真武大元帥真君。元是顯仁韋太后繪像奉事甚謹。朝夕不忘香火。高廟為康邸出使將行。見四金甲神人執弓劍以衛。紹興間慈寧殿出財建觀侍奉。遂于孤山古刹徙之為觀。次年內庭迎四聖聖像奉安。此觀觀額詔復東都延祥舊名。殿扁曰北極四聖之殿。殿門扁曰會真之門。三清殿扁曰金闕寒陽法堂。扁曰通真元命閣。扁曰清寧。皆理廟奎墨。藏殿扁曰瓊章寶藏。孝廟親墨。有堂扁曰瀛嶼。元是涼堂。扁建西宮以堂為黃庭殿。別創新堂。以此扁奉之。觀有瑞真道館。即延祥觀門也。

三茆寧壽觀

三茆寧壽觀在文寶山。元三茆堂。因東都三茆寧壽之名。賜觀額寧壽觀。殿扁曰太元。奉三茆真君像。觀中有三神御殿。觀中曾蒙賜三古器玩。皆希世之珍。一曰宋鼎。乃宋孝武帝之牛鼎。以祀太室之鼎。二曰唐鐘。係大唐常州澄清觀舊物。內庭出內帑金帛易以賜之。禁中每聽鐘聲以奉寢興食息之節。三曰褚遂良書小字陰符經。此物宣取復賜賈秋壑。觀之外曰東山。為殿以奉元命。有亭。扁曰賓日。俯見日出。又

有廡。扁曰仁壽。

開元宮

開元宮在太和坊內祕書省後。元寧廟潛邸為道宮。向東都有開元陽德觀。以奉火德。嘉泰年詔以嘉邸改充開元宮。儀制皆視佑聖觀。扁曰明離之殿。祀以立夏。又詔臨安府即殿左別建皇伯宣明王殿。遂徙大宗正司他所。悉以址為宮。作寧廟神御殿。又有璇璣殿。奉北斗。易扁曰北辰。衍慶殿以奉真武。順福神佑二殿奉元命。皆嘉明殿奎畫宮北建陽德館。以存修真之道侶。

龍翔宮

龍翔宮在後市街。元理廟潛邸。舊沂靖惠王府。詔建道宮。賜名龍翔。以奉感生帝。大門扁曰龍翔之宮。中門扁曰昭符之門。殿扁曰正陽之殿。禮官討論祀典。以正月上辛日。差侍從三獻官等。升為上祀行禮。備牲牢禮料。用十二籩豆。設祭歌宮架樂舞。受誓戒。望祭齋宮。行事內牲牢依祀天地禮例。用羊豕。所有儀像服色制度。有靈體殿廡下畫像可遵。朝議以龍翔宮奉感生帝。既屬羽流。合用齋醮之法。其正月上辛日望祭。自如其舊。奉旨從之。宮之左曰福慶殿。以待車駕。歇謁改為神御殿。正陽之

後殿為醮殿。宮西奉南真館。門曰南真之館。中門曰啟晨之門。三清殿扁曰三境儲祥。後殿扁曰申佑。以奉元命。西曰順福殿。以奉太皇元命。壽元殿奉南斗。景緯殿奉十一曜。鐘樓扁曰和應之樓。經樓扁曰凝真之章。藏殿扁曰琅函寶藏。小位次以備車駕宴坐。扁曰仙源。羽士之室。扁曰澄虛。內侍之舍。扁曰泉石。有高士三齋。曰履和。頤正。全真。

宗陽宮

宗陽宮在三聖廟橋東。以德壽宮地一半。建宮賜名。以奉感生帝。蓋此地前後環建王邸。又建廟毓聖之所。天瑞地符。益大彰顯。詔兩司相度建宮。大門扁曰宗陽之宮。中門扁曰開明之門。正殿扁曰無極妙道之殿。以奉三清。順福殿奉太皇元命。三清殿後為虛皇之殿。直北有門。扁曰真應之門。中建毓瑞之殿。以奉感生帝。後為申佑殿。奉元命。通真殿奉佑聖。自開明門內。左有玉籙之樓。景緯之殿。壽元之殿。右有樂簡之樓。瓊章寶書。北辰之殿。規制祀典。並視龍翔宮。行常以原饗。回歸行款。謁禮有降輦殿。曰福臨之殿。門曰福臨殿。門進膳殿。曰端拱。後有軒。扁曰勁霜。有圃。建堂二。曰志敬。曰清風。亭扁曰丹邱。元圃。亭之北鑿石池。堂扁曰垂福。後曰清境。園內四時。

夢
錄
卷八
七
奇花異木。修竹松檜甚盛。宮西有介真館。堂曰大範觀。後觀妙齋。曰會真澄妙常淨。
俱度廟奎藻。

夢梁錄卷八終

夢梁錄卷九

宋 錢塘吳自牧著

三省樞使諫官

三省即尚書省中書省門下省。樞密院國初循唐舊制。置院於中省之北。今在都堂東。上為樞屬列曹之所。蓋樞密使率以宰臣兼領。自知院以下。皆聚于都堂治事。省院在和寧門北首。舊福寧寺也。樞密院後建經武閣。係藏經武要略之文。中省門下後省在都堂後。諫院在後省之西。檢正左右司在諫院之右。向東。承旨檢詳編修在樞密院。三省樞密院監門大門之南。三省樞密院架閣在制勅院後。御史臺在清河坊內北向。蓋取嚴肅之義。內有朝堂。即臺廳也。自紹興來。未嘗置對。有屬臺臣。謝問。則刑察就聽于大理寺問罪矣。

六部

六部在三省樞密院之南。部之中堂。名曰論思獻納之堂。吏部掌天官。依唐制。以文武有官人分左右銓選。名之尚左。尚右。侍左。侍右。司封。司勳。考功。凡七司。以掌文武注授到部推賞等事。戶部名為地官。又稱民部。掌天下州郡財賦。得財用耗而

復行倉廩虛而復實之事。禮部謂之春官。掌禮儀。討論典故。講習典禮。大朝聘禮。慶賀朝儀。生辰聖節。元旦冬至朝會。郊祀明堂。合祀天地祖宗。典策秋享。祭祀社稷。封賜祀典。祠廟功臣。勳烈配享。及賜家廟祭器等事。兵部謂之夏官。掌兵伍廂軍。武舉投試。武藝金吾街仗人司兵。及大將出征告廟。破賊露布。鹵簿字圖。若番夷屬戶。授官封爵等事。及天下地圖。堡寨烽堠。番夷歸服。內附。皆掌之。又稱駕部。掌輦輅車。乘廐牧雜畜。乘具傳驛之政。令辨其出入之數。再名庫部。掌軍器儀仗。鹵簿法式。隨軍攻城什物。及供帳之事。是為四司主掌也。刑部謂之秋官。掌邦典之重輕。民訟之疑惑。重刑之出入。官僚之憲讞。皆主之。蓋民不問大小生死事體所係。四方訟刑得其平直。發于天庭。以稱其職。唐制。刑部分為四司。曰刑部。曰都官。曰比部。曰司門。是也。工部謂之冬官。掌工役程式。及天下屯田。文武官職田。京都衢關苑囿。山澤草木。畋獵漁捕。運漕碾磑之事。唐制名為四司。曰工部。曰屯田。曰虞部。曰水部。一皆所總也。

六部監門

六部監門在六部大門之左。凡所掌之事。隸于六部。部門受其出入之時。以聽上稽。